

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 17  
Setyembre 7, 2010  
www.philippinerevolution.net

Editorial

## Kabulukan ng rehimeng US-Aquino, mabilis nang nalalantad

**M**abilis na nahuhubaran ang pagpopostura ni Benigno Aquino III para sa “malinis na gub- yerno” at “pagbabago.” Ngayon pa ma’y ma- tingkad na ang mga palatandaan ng kabulukan at pagiging papet at reaksiunaryo ng kanyang rehimen, at mabilis nang nawawala ang na- unang kinang ng popularidad na ipi- nambulag at ipinanlinlang sa mama- mayan.


Kasisimula pa lamang ng kanyang rehimen ay agad nang pinatunayan ni Aquino ang kanyang pagiging tuta ng imperyalismong US. Animo’y aliping hu- mihingi ng limos at mumo sa amo, nagpa- dala siya ng mapagsumamong sulat kay Pres. Barack Obama ng US para bigyan ang kanyang bangkrap na re- himen ng MCC Millennium Challenge Account. Pinaunlakan ito ng US at binigyan ng \$434 milyon ang papet na rehimen, kapalit ng dagdag na mga konsesyon sa ekonomya, militar at pu- litika na ibayong yuyurak sa soberanya ng Pilipinas.

Tanda pa rin ng pagiging masunuring papet, pinata- tampok ni Aquino ang Private-Public Partner- ship na malinaw na na- kabalangkas sa imperyalis- tang globalisasyon at kaakibat ni-

tong mga patakaran ng denasyunalisasyon, pribatisa- syon, deregulasyon at liberalisasyon. Di pa nakunten- to, itinutulak ngayon ng American Chamber of Com- merce ang papet na rehimen na pag-ibayuhin pa ang liberalisasyon ng ekonomya ng Pilipinas sa pamamagitan ng pagbubukas ng mga bahagi ng ekonomya na nakalaan lamang sa mga Pilipino, tulad ng pagtitingi, telekomunikasyon at pag- mamay-ari ng lupa.

Maaga pa ay naipakita nang hungkag ang pagpopostura ni Aquino na “hindi magnana- kaw” at “hindi korap.” Siya ang kandida- tong nakatanggap ng pinakamalalaking kontribusyon sa kasaysayan ng mga elek- syon sa Pilipinas, subalit hindi niya iniulat ang lahat ng ito.

Sinusuklian na niya ngayon ang buhos na suportang ito sa kanyang kandidatura, sa kapinsalaan ng ma- mamayan. Bilang paninikluhod sa im- peryalistang amo, sunud-sunuran si Aquino sa atas ng International Mo- netary Fund na magpataw ng dag- dag na mga buwis sa mamamayan, itaas ang singil sa mga ser- bisyo publiko at bawasan ang mga subsidyo para mapigilan ang lalong pagkabangkarote ng gub- yerno. Napigilan lamang ng ma- lakas na mga protesta at maagap na pagkilos ng



**Mga tampok sa isyung ito...**

**Hostage crisis,**  
larawan ng kabulukan  
at kainutilan **PAHINA 3**

**35 armas nasamsam**  
ng BHB, 42 kaaway  
napatay **PAHINA 5**

**Gerilyang pagsusulat**  
**PAHINA 8**

mamamayan ang planong taasan ang *toll fee* sa mga *expressway*. Sa kabila ng napakaraming batikos, plano pa rin ng rehimeng taasan ang singil sa LRT at MRT. Dagdag na pasakit pa sa mamamayan ang pagbawas nang malaki sa subsidyo ng NFA sa pagbili ng bigas sa mga magsasaka at pagpasa nito sa mga mamimili.

Kabayaran din sa utang na loob ang pagluklok niya sa makapangyarihang mga pusisyon sa mga kinatawan ng mga imperyalista at kapwa niya malalaking kumprador at panginoong maylupa na sumuporta sa kanyang kandidatura. Dahil marami sa kanila ay may masasamang rekord, di nagtagal at sumingaw din ang baho ng mga ito. Agad na nalantad ang mga dating katiwalian at kinakitaan ng bagong mga anomalya at korapsyon ang kilos ng ilan sa kanyang hinirang na mga susing upisyal. Maaga pa'y sumingaw na at lalong tumatampok ngayon ang pagbabanggaan ng mga paksyon sa loob ng rehimen dahil sa magkakaibang pinagsisilbihang pang-ekonomya, paksyunal at pansariling interes. Umaabot na rin sa milyun-milyong piso ang halaga ng pagbebenta ng mga pinu-

nong upisyal ng bagong rehimen sa matataas na pwesto sa antas pambansa at rehiyon.


Hindi na naikubli ni Aquino sa usapin ng Hacienda Luisita ang kanyang makauring paninindigan bilang malaking panginoong maylupa. Kunwa'y ayaw niyang manghimasok kaugnay ng Stock Distribution Option (SDO) ng Hacienda Luisita Inc. dahil internal lamang daw na usapin ito sa hanay ng mga maysapi sa korporasyon. Ang totoo'y ang kanyang pagiging presidente ay kinakasangkapan ng kanyang asendero at komprador na angkan para mapigilan ang pagpapatupad ng tunay na reporma sa lupa sa asyenda, mapagibayo pa ang monopol-yong kontrol at pakinabang sa lupa, at kumita ng bilyun-bilyon sa pamamagitan ng pagpapalit-gamit dito. Instrumento rin siya ng buong uring panginoong maylupa para mapanatili ang kanilang monopolyo sa lupa. Sa gayon, instrumento siya para manatiling atrasa-

do ang kanayunan at api at pinagsasamantalahan ang uring magsasaka.

Pawi na ang pagpapakitang-tao ni Aquino na siya ay naninindigan para sa mga reporma at paghahatid ng mahusay na gubyrerno para raw masugpo ang pagrerebolusyon at pakikibaka ng mamamayan. Pangunahin pa rin siyang sumasandig sa dahas militar para supilin ang lumalakas na rebolusyonaryong kilusan at mga pakikibakang bayan. Pinalawig ng kanyang rehimen ang Oplan Bantay Laya hanggang Enero 31, 2011, habang binubuo pa ang bagong plano alinsunod sa 2009 US Counterinsurgency Guide. Awtomatiko ring pina-lawig ang kampanya ng pagbira sa mga hayag na lider masa at aktibista at mga pinaghihinalaang sumusuporta sa armadong rebolusyon. Kauupo pa lamang ni Aquino ay pito na ang sunud-sunod na naging biktima ng mga ekstrahudisyal na pamamaslang. Nalantad ang paggamit ng tortyur bilang patakaran ng gubyrerno. Walang humpay ang mga pang-aabusong militar, laluna sa kanayunan. Nakakulong pa rin ang Morong 43 at wala pang kahit isang detenidong pulitikal na pinalalaya.

Walang pagkakaiba ang rehimeng Aquino sa rehimeng Arroyo sa mababang prayoridad na ibinibigay nito sa usapang pangkapayapaan. Inuulit lamang nito ang mapanlinlang at mapanghati na lokalisadong usapang pangkapayapaan. Masahol pa'y ipinipilit nito ngayong magkaroon muna ng kagyat na tigil-putukan, na dagdag na paglabag sa dating mga kasunduan at kalakaran.

Hindi pa man natatapos ang unang 100 araw nito sa poder ay tuluyan nang nawalan ng saysay



Taon XLI Blg. 17 Setyembre 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editoryal

Kabulukan ng rehimeng US-Aquino	1
<i>Hostage crisis</i> , larawan ng kabulukan	3
Bayad-utang, una sa lahat	4

### Matatagumpay na TO

35 armas nasamsam ng BHB	5
Mga TO laban sa OBL	7
Gerilyang pagsusulat	8

### Pananalanta ng pasistang estado

Aktibista ng BM, pinaslang	9
Pagpapalawig sa OBL, binatikos	10
Pananambang sa mga sibilyan	10

### Balita

11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

ang maliliit at mabababaw na simbolikong pagbabagong ipinatutupad ni Aquino tulad ng “walang wang-wang” sa harap ng naglalakihang mga problema at mga anti-mamamayang tunguhin ng bagong guberno. Dagdag pa, nagpakita ng walang kapantay na kainutilan ang rehimeng Aquino sa pagharap nito sa *hostage crisis* na naganap noong Agosto 23 sa Luneta.

Sa harap ng lahat ng ito, lalo ngayong umaasa at nagsusumamo si Aquino sa pagsalba at patuloy na pagsuhay ng US sa kanyang paghahari. Sa kanyang pagpunta sa US ngayong Setyembre, hinahabol ni Aquino ang pag-aareglo ng higit pang ayudang militar

at pang-ekonomya kapalit ng pagbubukas pa ng bansa sa higit pang pagbabase ng mga tropang militar ng US, higit pang panghihimasok at dagdag pang mga konsesyon para makapagkamal ng ibayo pang supergansya sa bansa ang mga negosyo ng US. Magiging lubus-lubusan na ang pagkabuslo ng rehimeng Aquino sa lambat ng imperyalistang amo nito.

Ang ipinakikita ngayong pagkabulok, pagkareaksyunaryo at pagpapakapapet ng rehimeng Aquino ay tuluy-tuloy na sumisira at naghihiwalay dito sa mamamayan at magbibigay-daan sa ibayo pang pagsusulong ng rebolusyon at pakikibaka ng mamamayan. **AB**

## Hostage crisis, larawan ng kabulukan at kainutilan

**N**aging karima-rimarim na larawan ng kabulukan at kainutilan ng naghaharing sistema at ng rehimeng Aquino ang madugong kinalabasan ng pangho-*hostage* sa Maynila noong Agosto 23. Siyam ang napatay—walong turistang Tsino mula sa Hong Kong at ang nambihag na si dating Sr. Insp. Rolando Mendoza. Labindalawang turista pa ang nasugatan.

Si Mendoza ay dating upisyal ng PNP na natanggal sa katungkulan dahil sa isinampang kasong ekstorsyon laban sa kanya. Ginawa raw niya ang pambibihag sa hangaring maibalik siya sa serbisyo matapos di umusad ang kaso.

Tumampok sa pangyayaring ito ang kabulukan at kainutilan ng iba’t ibang sangay ng guberno, kabilang ang Ombudsman, ang Philippine National Police, ang pamahalaan sa syudad ng Manila, ang Department of the Interior and Local Government (DILG), Department of Foreign Affairs at Communications Group ng

rehimeng Aquino, at maging ni Benigno Aquino III mismo.

Sa loob ng 11 oras, sunud-sunod na kapalpakan ang ipinakita ng PNP at ng gubyernong Aquino sa pagharap sa krisis. Ang mas magaga sanang naresolbang krisis (sa pamamagitan man ng pagpapasuko o paggupo sa nambihag) ay tumagal nang ilang oras at humantong sa walang kapararakang pakikipagpalitan ng putok ng mga pulis sa kabila ng wala pang pagtiyak sa kaligtasan ng mga bihag.

Nasaksihan ng buong bayan at buong mundo ang lubos na kawalang kahandaan at kakayahan ng mga pulis sa pagsalba ng mga bihag (na ang iba’y

maaaring sila pa mismo ang nakatama at nakapatay).

Nakita ng buong mundo kung paano naging magulo at inutil ang buong guberno ni Aquino sa pagharap sa krisis at kung papaano pinalala ng kapalpakan at kainutilan ito ang buong krisis. Walang presensya at naging papel si Aquino mismo hanggang sa natapos na ang krisis. Ang upisyal niyang tumutok sa krisis ay si Undersecretary Rico Puno ng DILG na umaming walang anumang karanasan sa pagharap sa pangho-*hostage* o sa pamumuno sa pulisya. Si Puno ay isang malapit na kaibigan ni Aquino na nagnenegosyo sa baril na itinalaga para mamuno sa PNP, katungkulan na inalis sa itinalagang kalihim ng DILG na si Jesse Robredo.

Ang pagkakabiktima ng mga dayuhang turista mula sa Hong Kong ay lumikha ng usaping diplomatiko sa pagitan ng Pilipinas at China. Hindi nakatulong sa pagsasaayos nito ang kabiguan ng Malacañang na ipakausap kay Aquino ang hepeng administrador ng Hong Kong na si Donald Tsang matapos ang ilang oras ng paghihintay.

Matindi at malawak ang galit ng mamamayan ng Hong Kong sa gubyernong Aquino dahil sa nasaksihan nilang kapalpakang nagresulta sa pagkamatay ng kanilang mga kababayan. Apektado nang malaki ang turismo sa bansa matapos magbabala ang guberno ng China



laban sa pagbyahe sa Pilipinas. Hindi rin kaagad tinanggap ng gubyrerno ng China ang delegasyon na ipinadala ng rehimeng Aquino para makipag-usap doon. Hinihintay pa nila kung ano ang kalalabasan ng ulat at mga hakbangin ng gubyrerno ng Pilipinas kaugnay ng pangho-*hostage*.

Matapos ang pangyayari, kani-kanya na ang mga upisyal ng rehimeng Aquino sa paghuhugas-kamay sa responsibilidad sa pangyayari. Tumatampok sa mga ito ang pagkakahati-hati sa iba't ibang paksyon ng gubyrernong Aquino. Ang kawalan ng koordinasyon sa pagitan ng pangunahing mga upisyal ng DILG na sina Robredo (na nagmula sa grupong "Balay" na hawak ng

Liberal Party) at Puno (na tao naman ng grupong "Samar" na hawak ng Kamag-anak, Inc.) gayundin sa ibang pang ahensya ay nagresulta sa magulong pagharap ng gubyrerno sa krisis.

Nalantad dito ang kabulukan sa sistema ng pagtatataga at paghawak sa responsibilidad ng mga upisyal at ang kawalang responsibilidad at pagsubaybay ng nakatatasa na nagresulta sa kaguluhan sa pagharap sa naganap na krisis. Kaya naman ngayoy mabilis na nalalaglag ang mga palamuting ibinalot kay Aquino noong panahon ng eleksyon. Dismayadong-dismayado ang marami sa mga umasang maghahatid ng pagbabago si Aquino. **AB**

## Bayad-utang, una sa lahat

**H**indi prayoridad ng rehimeng Aquino ang pagbibigay ng serbisyong panlipunan, taliwas sa gusto nitong palabasin. Sa inihapag ni Benigno Aquino III na badyet para sa 2011, pinakamalaki pa rin ang inilaan nito para sa pagbabayad ng utang, katulad ng mga nagdaang rehimen.

Sa panukalang P1.645 trilyong pambansang badyet, P357.1 bilyon o 22% ang nakalaan sa pagbabayad ng interes pa lamang ng utang. Mas mataas ito nang P80.9 bilyon (halos 30%) kumpara sa inilaan noong nakaraang taon.

Ipinapanukala ring itaas ang badyet ng AFP nang 18% at ang badyet para sa Priority Development Assistance Fund na mas kilala bilang *pork barrel* mula P10.9 bilyon ngayong taon tungong P24.8 bilyon sa 2011.

Di nakuntento si Aquino sa dating P800 milyon at ginawa nang buong P1 bilyon ang "*contingency fund*" na direktang hahawakan niya at siya ngayong pinakamalaking *pork barrel*. Bukod pa rito'y minantine pa rin niya ang kwestyunableng P500 milyon pondong umano'y pang-intelidyens ng Presidential Anti-Organized Crime Task Force (PAOCTF) kahit wala na ito sa direktang pangangasiwa ng Malacañang.

Sa kabilang banda, nakatakang bumaba nang 3.5% ang badyet para sa serbisyong pangkalusugan (mula P40 bilyon ngayong ta-

on tungong P38.6 bilyon). Upang itago ito, ipinagmamayabang ni Aquino na dadagdagan niya ang badyet para sa programa ng pagbabakuna at pasilidad para sa mga bagong panganak.

Gayundin ang ipinagmamalaki ni Aquino na maglalaan ang kanyang rehimen ng P1.5 bilyon para sa tubig na maiinom sa mahihirap na komunidad. Ang totoo, binawasan ng rehimen ang badyet para sa *water resources development* at pagkontrol ng baha nang P4 bilyon o 22%. Malinaw ang pagsisinungaling at panloloko ni Aquino sa ganitong klaseng pagpapahayag ng mga piling detalye.

Malinaw ang tunguhin ng rehimen ng Aquino na ipaubaya na lamang sa pribadong sektor ang pagtatayo at paglalatatag ng mga imprastrukturang kailangang-kailangan ng mamamayan. Bumaba ang inilaan para sa agrikultura at repormang agraryo (kinaltasan ng P23.1 bilyon o 26%). Kinaltasan din ang para sa kuryente at enerhiya nang P3.4 bilyon o 65% at para sa mga kalsada at transportasyon nang P7.9 bilyon o 5%. Nagsingit

si Aquino ng P21.7 bilyon para sa suportang pampinansya sa mga programang *private-public partnership*. Dahil walang detalye ang probisyong ito, bulnerable ito sa korapsyon.

Dinagdagan ang badyet para sa edukasyon, pangunahin para sa matagal nang pangangailangan para sa konstruksyon ng mga bagong klasrum at pagkuha ng dagdag na mga guro. Naglaan ng P206.3 bilyon para sa batayang edukasyon mula P172.9 bilyon nitong taon. Pero kulang pa rin ito nang halos P100 bilyon para matugunan ang mga problemang kinakaharap ng sistema ng edukasyon sa ngayon. Masahol pa, kapalit nito ay binawasan ang badyet para sa mga pampublikong unibersidad at kolehiyo. Ang University of the Philippines, halimbawa, ay tatanggap na lamang ng P5.5 bilyon mula sa P6.9 bilyong inilaan nitong taon o mas mababa nang 26%.

Maliit lang umano ang naidagdag sa pambansang badyet para sa susunod na taon kumpara ngayong taon. Ayon sa DBM, ito ay dahil ititigil muna ng gubyrerno ang pagtatayo ng mga bagong imprastruktura at pagkuha ng mga bagong empleyado. Sa gayon, walang maaasahang pagbabago sa mga sahod at sweldo ng mga kawani at hindi magiging regular ang mga kaswal at kontraktwal na nagtatrabaho sa iba't ibang ahensya ng gubyrerno. **AB**



## 35 armas nasamsam ng BHB, 42 kaaway napatay

**N**akasamsam ang Bagong Hukbong Bayan (BHB) ng hindi bababa sa 35 armas kabilang ang isang K3 *light machine gun* sa matatagumpay na aksyong militar nito laban sa mga armadong galamay ng rehimeng US-Aquino mula noong huling hati ng Agosto hanggang unang araw ng Setyembre.

Nagtala rin ng 42 patay at 16 na sugatan sa panig ng kaaway kabilang ang tatlong mataas na upisyal ng pulis at militar (isang tin-yente ng Philippine Army at dalawang hepe ng pulisya). Sa kabilang banda, isang babaeng Pulang mandirigma ang magiting na nagbuwis ng kanyang buhay sa mga labanang ito.

Taliwas sa palaging iniulat ng mga propagandista ng kaaway, ipinapakita sa mga labanang ito ang tumataas na kakayahan ng mga yunit ng BHB.

**Sa Negros.** Naghakot ng dalawampu't isang armas ang BHB nang salakayin nila ang isang detatsment ng Delta Coy ng 12th IB CADRE Battalion sa Barangay Bug-ang,

bayan ng Toboso, Negros Occidental noong Agosto 28 ng hapon. Ang nasamsam na mga sandata ay kinabibilangan ng 11 ripleng Garand, walong M14 at dalawang M16, bukod pa sa mga bala, uniporme at *combat boots*.

Katatapos lamang mag-operasyon ang mga tropa ng detatsment na ito nang salakayin sila ng mga Pulang mandirigma ng Roselyn "Ka Jean" Pelle Command ng BHB sa Northern Negros Guerrilla Front. Bago ito, inaresto nila si Sgt. Efram Bagonoc, kumander ng detatsment, sa isang sabungan sa Sityo Pulangyan, Barangay Bug-ang.

Ayon kay Ka Cecil Estrella, tagapagsalita ng kumand, nang dalhin nila ang upisyal ng militar sa

detatsment ay tinangka nitong agawin ang armas ng isang Pulang mandirigma nang nasa tarangkahan na sila ng kampo. Dito na nangyari ang labanan na ikinamatay ng sargento at ikinasugat ng dalawang elemento ng CAFGU. Kaagad na dumating ang reimporsment ng BHB na lulan ng isang trak at sumuko ang nasorpresang mga paramilitar.

Nangyari ang taktikal na opensibang ito ilang araw lamang matapos magyabang si Maj. Gen. Vicente Porto, hepe ng 3rd ID, na lubhang mahina na ang BHB sa Negros at Panay.

**Sa Davao Oriental.** Labingwalong (18) sundalo ang napatay at sampung iba pa ang malubhang nasugatan sa dalawang pananambang ng mga Pulang mandirigma ng Conrado Heredia Command-Front 20 ng BHB noong Agosto 27 at 28.

Ang mga inambus na sundalo ay kabilang sa mga tropa mula sa 25th IB, 67th IB ng 1001st Infantry Brigade at mga elemento ng Scout Ranger Company na naglulunsad ng laking-brigadang operasyong sumasaklaw mula kabundukan ng Cateel at Boston hanggang sa Mt. Diwata Range sa Diwalwal, Monkayo, Compostela Valley noong huling bahagi ng Agosto. Layon ng malakihang operasyong ito na linisin ang erya para sa operasyon ng malalaking kumpanya sa pagtrotroso at ng malalaking kumpanya sa pagmimina.

Sinuyod ng isang platun ng 28th IB ang interyor na bahagi ng Boston ngunit hinambalos sila ng BHB. Tinambangan ng mga Pulang mandirigma ang mga kaaway sa Barangay Sumilao bandang alas-3 ng madaling araw noong Agosto 27. Sampu ang napatay at lima ang nasugatan sa panig ng AFP.

Kinabukasan, Agosto 28, ginailugad naman ng komposit na pwer-



sa ng 67th IB at SRC ang erya ng BHB. Pero pagdating nila sa Sityo Buko-Buko, Abijod, Cateel, sinalakay sila ng nag-aabang na mga pwersa ng BHB. Nagsimula ang labanan bandang alas-3 ng hapon at nagtagal ito nang 45 minuto. Walo ang nakumpirmang patay sa kaaway at limang iba pa ang malubhang nasugatan.

Taliwas sa pahayag ng AFP sa midya, walang kaswalti sa panig ng BHB. Ligtas silang nakaatras bago dumating ang reimporsment ng kaaway, ayon kay Ka Roel Agustin II, tagapagsalita ng Conrado Heredia Command-Front 20.

**Sa Davao City.** Naglunsad ng dalawang magkasunod na aksyong militar laban sa mga tropa ng 69th at 60th IB sa Paquibato District ang 1st Pulang Bagani Company ng BHB sa Southern Mindanao Region. Pinasabugan noong Agosto 31 ng isang *demolition team* ng 1st PBC ang mga tropa ng 69th IB sa pamumuno ni Lt. Ryan Belis sa Sityo Nursery sa Barangay Malabog. Kinabukasan, hinaras ng isa pang *demolition team* ng 1st PBC ang isang kolum ng 1003rd Brigade ng AFP na kinabibilangan ng mga tropa ng 60th IB at mga elemento ng Bahani Long Range Platoon-Alamara sa Sityo Quiambao, Barangay Lower Mapula. Bilang ganti, inistraping ng dalawang helikopter ang buong paligid nang kunin ng dalawa pang helikopter ang mga sundalong napatay at nasugatan. Dinala ang mga patay sa isang punerarya sa Panabo City.

Hindi maitago ng kaaway ang kanilang mga kaswalti at inamin nilang nagtamo umano sila ng dalawang patay (isang sundalo ng Philippine Army at isang elemento ng CAFGU) at dalawang iba pa ang ginagamot sa isang ospital.

Dalawang buwan nang binubugbog ng matitinding operasyong

militar ang Paquibato. Bukod sa 60th at 69th IB, kasama rin ang mga tropa ng 84th IB at mga elemento ng grupong *vigilante* na Alamara na kinuha pa mula sa Talaingod, Davao del Norte at ginagamit ng 1003rd Brigade para manalasa sa mga komunidad ng Lumad at settler sa Paquibato at iba pang kanugnog na lugar.

**Sa Bukidnon.** Tatlong elemento ng 4th ID ang napatay nang tambangan sila ng mga Pulang mandirigma sa ilalim ng Boyboy Roa Command sa Sityo Gamit, Barangay Sta. Filomena sa bayan ng Quezon noong Agosto 26.

**Sa Northern Samar.** Limang M16 at tatlong pistola ang nasamsam ng mga Pulang mandirigma ng Rodante Urtal Command (RUC) ng BHB nang malipol nila sa isang ambus ang walong pulis sa Imelda, Catarman noong Agosto 21.

Pinasabugan ng bomba ng mga gerilya ang sasakyan ng mga pulis na magreresponde sana sa isang ulat na may pinatay na isang opisyal ng barangay. Kabilang sa mga napatay si Sr. Insp. Nicasio San Antonio, pangalawang hepe ng pulisya ng Catarman.

Ayon kay Ka Amado Pesante, tagapagsalita ng RUC, bago nangyari ang ambus ay pinarusahan ng BHB sa salang pang-eespiya si T/Sgt. Rolando de Guia ng 63rd IB. Naging kublihan niya ang pagiging opisyal ng barangay habang aktibong naglalalatag ng mga lambat paniktik sa Catarman. Dati rin siyang malupit na tagapagsanay ng CAFGU sa ilalim ng 19th IB. Isang kalibre .45 pistola ang nasamsam sa kanya.

**Sa Agusan del Sur.** Isang K3 *light machine gun* at dalawang M16 ang nasamsam ng mga Pulang mandirigma ng Alejandro Lanaja Command (ALC)-BHB sa isang 15-minutong reyd sa himpilan ng 26th

IB sa Barangay La Fortuna, Veruela noong Agosto 24. Maliban sa mga armas, nasamsam din ang 1,800 na bala at sampung bala ng M203. Limang sundalo ang napatay at isa ang nasugatan.

Ayon kay Ka Aris Francisco, tagapagsalita ng ALC-BHB, ang aksyong militar na ito ay parusa sa matitinding paglabag ng yunit na ito sa karapatang-tao. Isang araw matapos ito, dalawang sundalo pa ng nasabing yunit at isang elemento ng CAFGU ang napatay nang tambangan ng mga Pulang gerilya habang nagpapatrulya.

**Sa Sorsogon.** Isang sundalo ng Special Operations Team (SOT) ng 49th IB ang napatay at isa rin ang nasugatan nang ambusin ng mga mandirigma ng BHB sa Barangay Sangat, Gubat noong Agosto 22. Kilala sa matitinding paglabag sa karapatang-tao ang nasabing yunit. Nakumpiska ang isang kalibre .45 pistola at mga bala.

**Sa Surigao del Sur.** Nasapol ng isang isnayper ng BHB-Larangan 19 si Insp. Christopher Mazo, hepe ng pulisya ng bayan ng Lianga, habang nasa sasakyan noong gabi ng Agosto 21. Ang sasakyan niya ay kabilang sa isang komboy ng limang sasakyang may lulang mahigpit 50 pinagsanib na pwersa ng Philippine Army at PNP sa Kolambogan Spar, Diatagon, bayan ng Lianga.

**Sa Misamis Oriental.** Napatay ang pusakal na operatiba ng Military Intelligence Battalion ng 4th ID na si S/Sgt. Elmo Penar nang barilin ito ng isang tim ng partisano ng BHB sa Napaliran, Balingasag noong Agosto 15. Nasamsam ang kanyang pistolang kalibre .45. Pinarusahan din ang kanyang badi-gard at *asset* sa paniktik. Si Penar ang utak sa pagkakadakip sa dalawang myembro ng BHB noong 2006. AB



# Sasalubungin ng mga taktikal na opensiba ang pagpapalawig ng OBL—*Ka Oris*

**S**asalubungin ng mas maiigting at malawakang mga taktikal na opensiba ng Bagong Hukbong Bayan (BHB) ang pagpapalawig sa Oplan Bantay Laya (OBL) hanggang Enero 31, 2011, ani Jorge “Ka Oris” Madlos, tagapagsalita ng National Democratic Front-Mindanao.

Lalong iigting ang mga taktikal na opensibang ito habang ipinatanggol ng BHB at mga rebolusyonaryong mamamayan ang kaniyang mga tagumpay, ani Ka Oris. Sa katunayan, sa Mindanao lamang ay nakapaglunsad ang mga yunit ng BHB ng 50 taktikal na opensiba mula Hulyo hanggang Agosto—20 sa Southern Mindanao Region (SMR), 27 sa Northeastern Mindanao Region (NEMR) at tatlo sa Far South Mindanao Region at North Central Mindanao Region.

Pinakamatingkad sa mga atritibo at anihilatibong atake ng BHB sa SMR ang reyd noong Agosto 24 sa Barangay La Fortuna, Veruela, Agusan del Sur. Nawalan dito ang reaksyunaryong guberno ng isang tinuyente at apat na sundalo ng 26th IB. Nakasamsam ang mga Pulang mandirigma ng isang K3 *light*

*machine gun*, dalawang M16 at mga bala. Noon ding Agosto, tinambangan at napatay ang dalawang sundalo ng Division Reconnaissance Company kasama ang isang sagadsaring lider ng paramilitar na Bagani Force. Nakumpiska sa kanila ang dalawang M16.

Halos walang patlang din ang mga labanan sa mga bulubunduking erya ng Davao City; sa mga bayan ng Maragusan, New Bataan at Monkayo sa Compostela Valley; sa mga bayan ng Mati, Baganga at Cateel sa Davao Oriental; sa New Corella, Davao del Norte; sa Davao del Sur; at sa North Cotabato.

Nakapagtala naman ng 27 taktikal na opensiba ang BHB sa NEMR habang halos lahat ng mga bayan sa apat na prubinsya nito ang inatake ng mga pasistang tropa. Dalawang magkasunod na ambus ang

inilunsad ng BHB noong Agosto 13. Ang una ay laban sa mga sundalo ng Scout Ranger Company (SRC) sa Purok 5, Barangay Pining, Butuan City. Kasunod nito ay tinambangan ang mga elemento ng 30th IB sa Lusong, Barangay Puting Bato, Cabadbaran City. Apat na patay at anim na sugatan ang kaswalti ng kaaway.

Noong Agosto 28, inatake ng tatlong tim ng BHB ang limang umaatakeng kolum ng pinagsamang mga pwersa ng 14th SRC, 75th IB at SWAG (Special Warfare Group). Ang halos isang brigadang pwersa ng kaaway na ito ang sapilitang umokupa sa magkalapit na komunidad ng Palonpon at Borirgon sa Barangay Mahaba, Marihatag, Surigao del Sur. Nagtamo ang kaaway ng limang patay at tatlong sugatan.

Sa buwan lamang ng Agosto, nakapaglunsad ng tatlong aksyong militar ang mga Pulang mandirigma sa Far South Mindanao Region. Noong Agosto 3, hinaras nila ang tropa ng 39th IB sa Dungan Pekong, Matan-ao, Davao del Sur. Kinabukasan, pinarusahan nila ang isang ahenteng paniktik ng militar at noong Agosto 8, tinambangan ng BHB ang pwersa ng 27th IB sa Datal Blao, Columbio, Sultan Kudarat.

Hindi rin pinagpahinga ng hukbong bayan sa North Central Mindanao Region ang mga nag-ooperasyong batalyon na nasa ilalim ng 1st Tabak Division ng Western Mindanao Command. Umaabot sa 24 na sundalo ang naitalang napatay sa iba’t ibang taktikal na opensiba at engkwentro sa rehiyon mula Abril hanggang Agosto.

AB



# Gerilyang pagsusulat

*Masigla kapwa ang paglikha ng rebolusyonaryong sining at ang rebolusyonaryong peryodismo kahit sa gitna ng makilos na manera ng pakikidigmang gerilya. Sumusunod ang personal na karanasan ng isang Pulang mandirigma at manunulat sa kanyang pakikihamok kapwa sa landas ng armadong pakikibaka at rebolusyonaryong kultura.*

**H**abang umaatras galing sa isang aksyong militar at habang naghahanda para tambangan ang posibleng reimporsment ng kaaway, tumityempo si Ka Agos na kunin ang kanyang bolpen at tinagutagong papel na pang-grade four sa kanyang bakpak. At kung gaano kabilis ang kanilang pagdisarma sa mga gwardya ng isang plantasyon ng saging, nag-umapaw naman ang mga mapanlikhang salita sa kanyang isipan upang maisulat ang isang kwentong pambata.

Isang araw pang pag-atras patungo sa isang ligtas na lugar at natapos ni Ka Agos ang "Ang Nasa-ag nga Aninipot" (Ang Naligaw na Alitaptap) na isinama sa isang kalipunan ng mga akdang pampanitikan para sa pagdiriwang ng ika-40 anibersaryo ng Partido Komunista ng Pilipinas.

Ipinakikita nito kung paanong umuusbong sa sinapupunan ng digmang bayan ang mga malikhaing sulat. Nakasanayan na ni Ka Agos na magsulat kahit walang lamesa o tahimik na lugar (bagamat tahimik naman ang kanilang pag-atras) at kahit sa gitna ng maraming aktibidad. Ipinakita niya ang nagawang pag-angkop ng isang rebolusyonaryong manunulat sa nagbabagu-bagong sitwasyon ng umiigting na digmaan, kung saan ang pagiging makilos ay siya nang buhay ng isang Pulang mandirigmang kagaya niya. Napakadalang ng pamamahing, aniya.



"Kahit saan, kahit kailan, at kahit sa anong sitwasyon," natutuwang sinabi ni Ka Agos. "Kung saan-saan ako nagsusulat." Nariyang nakaupo lamang siya sa isang sako ng bigas sa kusina ng kampo para sa isang Batayang Kursong Pampartido (BKP) at hindi alintana ang ingay ng mga kasama at masang taguyod na nagsisibak ng kahoy at nagluluto ng monggo. Naisulat niya ang dalawang maikling kwento na kanyang isinumite para sa isang palihan sa panitikan na isinagawa ng istap ng *Ulos* ilang taon na ang nakararaan. Sa iba pang mga sitwasyon (kadalasa'y sa mga pamamahinga sa lakaran o pagkatapos ng gawaing masa), kanyang nadugtungan ang nasabing mga kwento ng mga kaugnay pang kwento at nabuo sa ngayon ang isang maikling nobela na naghihintay lamang na mailimbag.

Sa katunayan, ang pagsusulat ay maaaring gawin kahit sa hindi pirming lugar. Pwede itong gawin sa gerilya o makilos na pamamaraan kahit sa kalunsuran, ayon naman kay Ka Zel, isang organisador ng sektor ng kababaihan na inimitahan sa isang *press work* ng *Asdag*,

ang pahayagang masa ng Far South Mindanao Region.

Nariyang palipat-lipat sila ng mga bahay habang papalakas ang pagbuhos ng ulan kasabay ng pagkidlat at pagbaha sa kanilang dinaaraan patungo sa iba na namang bahay sa isang komunidad. Ito'y matapos silang tumanggap ng impormasyong may dinakip na isang organisador. Dahil hindi pa malinaw ang sitwasyon, hindi kaagad sila nakapagpatuloy sa pagsusulat at nakipagkwentuhan muna sa masasa na naghain sa kanila ng mainit na kape. Ngunit nang malamang hindi naman pala totoo ang nasabing pagdakip, kani-kanya nang naglabasan ng *laptop* at bolpen at papel. May isa na sa plantsahan na nagsulat. Sa katunayan, nakapagsusulat siya noon kahit nakaupo lamang sa sahig, aniya.

Ngunit sabi ni Ka El, na isa sa mga patnugot ng nasabing pahayagan, na kahit gerilya ang sitwasyon ng pagsusulat, mahigpit pa rin dapat ang pagtangan sa prinsipyo ng kolektibong pagsusulat at kolektibong pagrepaso (o pag-edit) sa mga artikulo para matiyak na hindi lamang maayos ang estilo kundi wasto rin ang linyang pampulitika ng katha. Pinag-uusapan muna sa kolektibong pagpapalano ang lalaminin at sa kolektibong pagrepaso ang mismong natapos na akda.

Dagdag pa, sa kabila ng kakulangan ng istap sa nasabing pahayagan, madali pa ring makapaglabas ng pahayagan kung titipunin ang mga manunulat sa iba't ibang sektor gaya ng kababaihan at kabataan, at bubuuin ang isang taktikal na grupo ng mga manunulat. Bukod sa mapahuhusay ang kakayahan ng bawat isa sa kolektibong pagsusulat, maibabahagi rin nila ang ganitong kakayahan sa kanilang pinanggalingang sektor. Sa ganito'y mas lalo pang darami ang manunulat na nagsisilbi sa rebolusyonaryong kilusan. **AB**



# Aktibista ng Bayan Muna, pinaslang

**I**sang kasapi ng Bayan Muna (BM) sa Eastern Samar ang pinaslang. Samantala, dalawang kabataan sa Samar ang sapilitang ginawang giya ng militar at pinalabas na mga nagsisukong rebelde. Sa Misamis Oriental, winasak ng mga nag-ooperasyong sundalo ang sistema sa tubig sa isang liblib na baryo.

**Agosto 25.** Pinagbabaril ng pinaghihinalaang elemento ng *death squad* ng militar si Casiano Abing, 56, kasapi ng partidong Bayan Muna (BM) sa Eastern Visayas noong Agosto 25 ng gabi sa kanyang bahay sa Barangay 5, Poblacion, Balangiga, Eastern Samar.

Si Abing ay nagtamo ng limang tama ng bala. Dinala muna siya sa isang pagamutan sa Balangiga at kalaunan, sa St. Paul's Hospital sa Tacloban City, Leyte pero namatay siya nang dumating dito matapos ang isa't kalahating oras na byahe. Siya ang ikaanim na aktibistang pinatay makaraang umupo si Benigno Aquino III bilang pangulo ng bansa at ika-121 biktima ng ekstrahudisyal na pamamaslang sa Eastern Visayas mula noong 2001.

Ayon kay Atty. Katrina Castillo, pinuno ng *documentation and legal services* ng Katungod-Sinirangan Bisayas, lokal na sangay ng Karapatan, si Abing ay naging aktibo sa pangangampanya noong nakaraang eleksyon para sa BM at sa kandidatura sa Senado nina Satur Ocampo at Liza Maza. Dagdag pa ni Castillo, bago patayin, napansin ng biktima na minamanmanan siya.

**Agosto 13.** Winasak ng mga tropa ng 8th IB at Division Reconnaissance Company ng 4th ID ang lokal sa sistema ng tubig sa Sityo Salahon, Barangay Alipuat, Salay, Misamis Oriental dahil sa paratang na proyekto ito ng Bagong Hukbong Bayan.

Ayon kay Ka Cesar Renerio, tagapagsalita ng National Democratic Front sa North Central Mindanao

Region, galit na galit ang mga residente ng Sityo Salahon na nagtiyagang magbuo ng sistema ng tubig matapos balewalain ng lokal na reaksyunaryong gubyrno ang kanilang matagal nang kahilingang magkaroon ng maayos



na suplay ng tubig. Dalawang kilometro ang layo ng pinagmumulan ng tubig at nagtiyaga ang mamamayan ng sityo na gumawa ng mga tubong yari ng pinagdugtong-dugtong na kawayan para magkaroon ng tubig ang bawat bahay.

Iginigiit ngayon ng mga taga-Sityo Salahon sa Philippine Army na bayaran ang nasirang sistema ng tubig at parusahan ang mga upisyal na responsable sa pagkawak ni-

## Mag-inang Oliveros, ibinalik sa PGH

**I**binalik sa Philippine General Hospital (PGH) sina Carina Judilyn Oliveros at ang kanyang sanggol mula sa Camp Bagong Diwa sa Bicutan, Taguig City nitong Agosto 30 alinsunod sa utos ng Morong Regional Trial Court (MRTC).

Ang desisyon ng MRTC ay bunsod ng patuloy na pagkilos ng tinaguriang Morong 43 at mga sumusuporta sa laban nila. Naglunsad ng *hunger strike* ang mga detenidong manggagawang pangkalusugan mula Agosto 21 para batikusin ang patuloy na paglabag sa kanilang karapatang-tao at di pagpapatupad ng batas sa kanilang kaso. Tinutulan din nila ang di makatao at di makatarungang desisyon ng mababang hukuman na ibalik sa kulungan ang mag-ina.

Nanganak si Oliveros noong Hulyo 22 sa PGH. Noong Agosto 20 ay pwersahan siyang ibinalik sa Camp Bagong Diwa kasama ang kanyang bagong silang na sanggol.

Iniutos ng korte ang pagbabalik ng mag-ina sa PGH nang magapela ang mga abugado ni Oliveros. Subalit naantala ito nang limang araw dahil sadyang pinabagal ng Bureau of Jail Management and Penology ang implementasyon ng kautusan.

Mananatili ang mag-ina sa PGH sa loob ng tatlong buwan.

Samantala, iginigiit ni Sen. Pia Cayetano, tagapangulo ng Committee on Youth, Women and Family Relations ng Senado na pahintulutan ng korte si Oliveros na palawigin pa nang tatlong buwan ang kanyang pananatili sa PGH. Ito ay para mapasuso niya ang kanyang anak nang anim na buwan. Sabi ng senadora, inirerekomenda ng World Health Organization ang eksklusibong pagpapasuso sa bagong silang na mga sanggol nang di bababa sa anim na buwan. **AB**



to.

**Hulyo.** Pinahirapan at ginawang mga giya sa mga operasyong militar ng 34th IB ang magkapatid na Cesar at Juanito Gabac. Sila ay mga ordinaryong kabataang magsasaka ng Barangay Anagasi, Paranas, Samar, ayon kay Fr. Santiago Salas, tagapagsalita ng National Democratic Front-Eastern Visayas.

Ipinrisinta ng 8th ID sa midya noong Agosto 16 ang magkapatid bilang mga kasapi umano ng BHB na nagbalik-loob daw sa gubyerno. Ang totoo, ani Fr. Salas, ang magkapatid kasama ang kanilang inang si Lucia ay dinukot noong Hulyo 25 ng mga elemento ng

34th IB sa pamumuno ni Lt. Col. William Peñañiel.

Ayon sa militar, ang magkapatid ay nagsalong ng kanilang mga armas dahil “napagod” na sila sa armadong pakikibaka at “nakikipagtulungan” na sa pamahalaan. Gawa-gawang kwento lamang ito ni Lt. Col. Peñañiel, ani Fr. Salas, dahil hindi naman nakuha sa dalawang kabataan ang mga armas na ito. Nakuha ang mga armas sa isang temporaryong pinagtaguan ng BHB at pilit na ipinaako ito sa magkapatid.

Hindi binigyan ng pagkakataong madepensahan ng magkapatid na Gabac ang kanilang mga sarili o makakuha man lamang ng abugado, sabi ni Fr. Salas. **AB**

## Pagpapalawig sa OBL, mariing binatikos

**U**maani ng matitinding batikos mula sa iba't ibang sektor ang pagpapalawig ng rehimeng US-Aquino sa Oplan Bantay Laya (OBL) hanggang Enero 31, 2011.

Nagtapos ang OBL noong Hunyo 30 pero bigo ito sa layunin ng AFP na durugin ang Bagong Hukbong Bayan (BHB). Sa proseso ng pagpapatupad nito, nakapagtala ang grupong Karapatan ng 1,206 dokumentadong kaso ng mga ekstrahudisyal na pamamaslang, 205 kaso ng mga pagdukot na kagagawan ng militar at iba pang armadong pwersa ng estado at marami pang kaso ng pagtortur at panggigipit.

Sa kabila ng malawak na pagbatikos sa OBL1 at 2, inianunsyo ni Chief of Staff Gen. Ricardo David ng AFP noong Agosto 15 na palalawigin pa ito nang anim na buwan. Para maging epektibo umano ito, tututok daw ang militar sa pagtuturo ng kahalagahan ng karapatang-tao.

Malaking pambabaluktot ito, ani Marie Hilao-Enriquez, tagapangulo ng Karapatan, dahil ang mga itinuturong lumalabag sa karapatang-tao ang siya pang magtuturo sa mamamayan ng kahalagahan nito. Gusto ni Benigno Aquino III na basta na lamang tanggapin ng mamamayan ang programang *counter-insurgency* ng kanyang rehimen sa

kabila ng mga duguang kamay ng militar. Imbes na parusahan ang mga nagkasala ay kinukunsinti pa sila ngayon ng pangulo, dagdag ni Enriquez.

Mangangahulugan lamang na sa ekstensyon ng OBL ay magpapatuloy ang mga malawakang kampanyang militar at pananalasa sa malawak na kanayunan sa bansa,

sabi ni Renato Reyes, pangkalahatang kalihim ng Bagong Alyansang Makabayan (BAYAN).

Naghahasik ngayon ng lagim ang mga tropa ng militar, pulisya, paramilitar at mga pribadong hukbo ng mga *warlord*-pulitiko at malalaking negosyong kumprador at dayuhan sa mga prubinsya ng Davao, Compostela Valley, mga prubinsya ng Samar, sa isla ng Negros, mga prubinsya ng Bicol at sa Aurora sa Central Luzon. **AB**

### Pananambang sa mga sibilyan sa Masbate, kinundena ng NDF

**K**inundena ni Kasamang Gregorio Bañares, tagapagsalita ng National Democratic Front-Bicol ang pananambang sa limang sibilyan sa Sityo Landing, Barangay Bolod, San Pascual, Masbate noong Agosto 28. Sa kanyang pahayag sa midya noong Agosto 30, sinabi ni Bañares na ayon sa panimulang pagsisiyasat ng Jose Rapsing Command ng Bagong Hukbong Bayan sa Masbate, may kaugnaan sa maruming away ng mga pulitiko ang motibo sa pananambang at walang kinalaman ang anumang yunit ng BHB sa insidente.

Binatikos ng tagapagsalita ng NDF-Bicol ang malisyoso at walang batayang pahayag ng Philippine National Police (PNP) at Armed Forces of the Philippines (AFP) na nagpapahiwatig na nakikipagsabwatan umano ang BHB sa ilang pribadong hukbo ng mga pulitiko sa Masbate. Layunin ng paninirang ito na takpan ang inuutil at walang kwentang kampanya ng militar at pulisya na buwagin ang mga pribadong hukbo sa Masbate, ani Bañares. **AB**

## Araw ng mga *desaparecido*, ginunita

NAGLUNSAD ng kilos-protesta ang mga progresibong organisasyon at mga kamag-anak ng dinukot ng mga armadong galamay ng estado bilang paggunita sa Pandaigdigang Araw ng mga Desaparecido noong Agosto 30.

Nagmartsa sila mula sa tapat ng University of Sto. Tomas tungong Mendiola Bridge sa Maynila. Pangunahing panawagan nila kay Benigno Aquino III na bigyang hustisya ang mga dinukot at pinaslang sa ilalim ng nakaraang rehimen ni Gloria Arroyo.

Magpapatuloy ang kanilang panawagang ilitaw at bigyang hustisya ang mga dinukot, ayon sa Families of the Disappeared for Justice (DESAPARECIDOS) at Victims of Arroyo United for Justice (Hustisya). Iginigiit din nila na parusahan si Arroyo at mga galamay niya sa mga paglabag sa karapatang-tao.

Dismayado naman ang Bagong Alyansang Makabayan (BAYAN) sa kawalang aksyon ng rehimeng Aquino sa isyu ng mga pagdukot. Kasabay nito, binatikos ng BAYAN ang pagkakatalaga kay Loretta Ann Rosales bilang tagapangulo ng Commission on Human Rights.

Noong Agosto 20 ay naglunsad rin sila ng kilos-protesta sa Quezon City. Inilabas nila ang higanteng dilaw na laso na may pinturang pula at may mga larawan ng mga dinukot bilang simbolo ng paghahangnap ng katarungan.

Samantala, nagkaroon din ng pagkilos ang mga aktibista sa US sa pangunguna ng BAYAN-USA sa San Francisco, California. Hiniling naman nila kay Aquino na palayain na ang Morong 43 at itigil na ang Oplan Bantay Laya.

## Ka Roda, lider ng mga drayber, pumanaw na

PUMANAW na ang isang haligi ng sektor ng transportasyon. Si Medardo “Ka Roda” Roda ay namatay bunsod ng atake sa puso noong Setyembre 5. Una siyang na-*stroke* noong 2002.

Si Ka Roda ay ipinanganak noong Oktubre 27, 1934 sa Libmanan, Camarines Sur. Nagmula siya sa uring magsasaka. Nagpatuloy siyang mag-aral sa kolehiyo sa Maynila at namasukang drayber ng taksi noong 1960 at nang lumaon ay naging drayber ng dyip na byaheng Cubao-V. Luna, Quezon City noong 1978.

Naging pinuno si Ka Roda ng lokal na samahan ng mga drayber. Isa rin siya sa mga namuno sa Pinagkaisang Samahan ng mga Tsupper at Operators Nationwide (PISTON) nang itatag ito noong 1981. Nahalal siyang ikatlong bise presidente ng organisasyon at makalipas ang ilang buwan ay naging presidente nito. Naging tagapangulong pandangal ng PISTON si Ka Roda mula nang magkasakit siya noong 2002 hanggang sa kanyang kamatayan.

Pinamunuan ni Ka Roda ang PISTON sa iba't ibang mga pagkilos. Isa na rito ang pagtutol nila sa PD 1605 na nagkakansela sa lisensya ng drayber sa ikatlong paglabag sa batas trapiko. Pinamunuan din niya ang mga pagkilos sa tanggapan ng mga upisina ng kumpanya ng langis at mga tigil-pasada sa Metro Manila. Binansagan siya ng dating rehimeng Marcos bilang “pinakarebeldeng drayber sa buong kasaysayan ng Pilipinas” at ipinakulong noong 1983. Naku-long muli siya noong 1988 at 1990 sa ilalim ng rehimeng Corazon Aquino.

Marami ang nakiramay at nakidalamhati sa kanyang pagpanaw. Magsisilbing inspirasyon sa demokratikong kilusan ng mga drayber at masang anakpawis ang buhay ni Ka Roda na walang pag-iimbot na naglingkod sa sambayanan.

## Alex Remollino, makabayang makata, namatay na

PUMANAW na noong Setyembre 3 si Alexander Martin Remollino, 33 taong gulang at kilala bilang progresibong manunulat, aktibista at makata. Namatay siya bunsod ng impeksyon sa baga.

Kabilang si Remollino sa mga nagtatag ng Kilometer 64, isang grupo ng mga makata. Naging kasapi siya ng League of Filipino Students noong nasa kolehiyo at napabilang sa Ibon Foundation. Naging manunulat din siya ng iba't ibang progresibong pahayagan sa internet tulad ng *Philippine Online Chronicles*, *Tinig.com* at *Bulatlat*. Kasapi rin siya ng National Union of Journalists of the Philippines. Naging mananaliksik siya ng Bagong Alyansang Makabayan (BAYAN) at Kontra-Daya.

Ang tula niyang “Tuparin Natin ang Banta ng Ating Panahon” ay naging tampok sa produksyong multi-midya na *Arrest Gloria* noong panahon ng pakikipaglaban sa rehimeng Arroyo.

Isinilang siya noong Agosto 6, 1977 sa Mandaluyong City. Lumaki siya sa San Pedro, Laguna at kumuha ng AB Legal Management sa University of Sto. Tomas.

### Unyon sa ABS-CBN, kinilala ng DOLE

NAGKAMIT ng panimulang tagumpay ang mga manggagawa ng ABS-CBN Internal Job Market Workers Union nang kilalanin ng Department of Labor and Employment (DOLE) ang kanilang unyon.

Inilabas ang desisyon ng DOLE noong Agosto 18 na nagsasabing ang mga manggagawa sa ilalim ng IJM ay dapat kilalanin dahil gumagampan sila ng trabaho para sa kapakanan ng kumpanya. Hiniiling din ng DOLE na magsagawa ng *certification election* para tuluyang kilalanin ang unyon.

Binatikos ng mga kasapi ng IJM Workers Union ang pang-aapi sa kanila ng maneydsment sa piket na ginawa nila sa labas ng kumpanya ng ABS-CBN noong Agosto 20.

Sinuportahan sila ng Kilusang Mayo Uno (KMU), mga manggagawa ng Philippine Airlines at Kowloon House, mga estudyante at ng National Union of Journalists of the Philippines.

Matatandaang pinapirma ng maneydsment ang mga manggagawa nito sa mga kontratang nagsasaad na sila ay mga kontraktwal o *talent* lamang ng kumpanya. Mariin itong tinututulan ng unyon dahil malalagay sa alanganin lalo na ang mga matagal nang nagtatrabaho sa ABS-CBN. Samutsaring maniobra ang ginawa ng kumpanya para wasakin ang unyon, at isa na rito ang pagtatanggal sa 110 manggagawa.

### Laban sa pagtaas ng pasahe sa LRT-MRT, inilunsad

NAGBUO ng malawak na alyansa ang Kilusang Mayo Uno (KMU) at Anakpawis laban sa napipintong pagtaas ng pasahe sa Light Rail Transit (LRT) at Metro Rail Transit (MRT) sa Metro Manila. Ang Riles Laan sa Sambayanan Network (RILES) ang siyang tututok sa pagpapahinto ng dagdag singil sa pasahe. Sinimulan na nito ang pagpapapirma ng petisyon sa mga sumasakay ng MRT sa Cubao Station sa Quezon City nitong Setyembre 1. Unang ginawa ng Bagong Alyansang Makabayan (BAYAN) at League of Filipino Students (LFS) ang pagpapapirma sa mga pasahero noong Agosto. Marami ang pumirma sa petisyon bilang pagtutol sa nasabing pagtaas.

Ayon kay Sammy Malunes, tagapagsalita ng RILES, hindi dapat pasanin ng mga pasahero ang mga utang at pagkakalugi ng kumpanya. Aniya, dapat bigyan ng serbisyo ang mamamayan sa pamamagitan ng abot-kayang pasahe sa LRT at MRT. Tutol din ang RILES sa planong pagsasapribado ng MRT at LRT dahil ang pagkakamal ng malaking kita ang magiging pakay ng mga pribadong kumpanya sa halip na paghahatid ng abot-kayang serbisyo, na dapat sana'y siyang layunin ng transportasyong pampubliko.

Planong itaas nang ₱25.00 ang pasahe sa LRT ngayong Setyembre. Posible namang dagdagan ng ₱44 ang singil sa MRT. Ayon sa KMU, aabot sa ₱50 bawat manggagawa ang magiging gastos sa pagsakay ng MRT at LRT bawat araw.

### Misyong pangkombat ng US sa Iraq, tinapos na

TAPOS na ang "Operation Iraqi Freedom," ani US President Barack Obama nitong Setyembre 1 bilang upisyal na pagtuldok sa misyong pangkombat ng mga sundalong Amerikano sa Iraq.

Sa taong 2011 pa sana ang nakatakdang upisyal na pag-alis ng mga sundalong pangkombat ngunit pinaaga ito ni Obama dahil sa lumalawak na sentimyentong kontragera sa US at iba pang bansa. Habang patuloy na gumagastos ang US ng malaking pondo at rekurso sa Iraq, hrap na hrap naman sa badyet ang gubyrno nito.

Nitong nakaraang pito't kalahating taon, 4,427 ang naitalang napatay na sundalong US habang 34,268 naman ang nasugatan. Nagdulot ito ng 100,000 kaswalti sa populasyon ng Iraq.

Samantala, mananatili pa hanggang katapusan ng 2011 ang 50,000 tropang Amerikano sa Iraq bilang mga "tagapayo at taga-alalay" sa mga tropang Iraqi.

Lubusang alisin man ang presensya ng mga unipormadong tropa ng US sa Iraq, ikukubli lamang ng US ang interbensyong militar nito sa bansa sa pamamagitan ng higit pang pagpapalit ng mga mersenaryong tropa sa mga unipormadong tropa. Nitong nakaraang dalawang taon, umabot na sa mahigit 130,000 (mas malaki na sa bilang ng mga unipormadong tropa) ang bilang ng mga mersenaryo sa Iraq na isinuplay ng mga pribadong kontratista sa mga gawaing militar at panseguridad. Plano pang dagdagan ang mga ito.

Lalo ngayong nababahala ang papet na gubyrno sa Iraq sa harap ng wala pa ring puknat na paglaban ng mga gerilyang Iraqi.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 17  
Setyembre 7, 2010  
www.philippinerevolution.net

Editoryal

## Kabulukan ng rehimeng US-Aquino, mabilis nang nalalantad

**M**abilis na nahuhubaran ang pagpopostura ni Benigno Aquino III para sa “malinis na gub- yerno” at “pagbabago.” Ngayon pa ma’y ma- tingkad na ang mga palatandaan ng kabulukan at pagiging papet at reaksiunaryo ng kanyang rehimen, at mabilis nang nawawala ang na- unang kinang ng popularidad na ipi- nambulag at ipinanlinlang sa mama- mayan.


Kasisimula pa lamang ng kanyang rehimen ay agad nang pinatunayan ni Aquino ang kanyang pagiging tuta ng imperyalismong US. Animo’y aliping hu- mihingi ng limos at mumo sa amo, nagpa- dala siya ng mapagsumamong sulat kay Pres. Barack Obama ng US para bigyan ang kanyang bangkrap na re- himen ng MCC Millennium Challenge Account. Pinaunlakan ito ng US at binigyan ng \$434 milyon ang papet na rehimen, kapalit ng dagdag na mga konsesyon sa ekonomya, militar at pu- litika na ibayong yuyurak sa soberanya ng Pilipinas.

Tanda pa rin ng pagiging masunuring papet, pinata- tampok ni Aquino ang Private-Public Partner- ship na malinaw na na- kabalangkas sa imperyalis- tang globalisasyon at kaakibat ni-

tong mga patakaran ng denasyunalisasyon, pribatisa- syon, deregulasyon at liberalisasyon. Di pa nakunten- to, itinutulak ngayon ng American Chamber of Com- merce ang papet na rehimen na pag-ibayuhin pa ang liberalisasyon ng ekonomya ng Pilipinas sa pamamagitan ng pagbubukas ng mga bahagi ng ekonomya na nakalaan lamang sa mga Pilipino, tulad ng pagtitingi, telekomunikasyon at pag- mamay-ari ng lupa.

Maaga pa ay naipakita nang hungkag ang pagpopostura ni Aquino na “hindi magnana- kaw” at “hindi korap.” Siya ang kandida- tong nakatanggap ng pinakamalalaking kontribusyon sa kasaysayan ng mga elek- syon sa Pilipinas, subalit hindi niya iniulat ang lahat ng ito.

Sinusuklian na niya ngayon ang buhos na suportang ito sa kanyang kandidatura, sa kapinsalaan ng ma- mamayan. Bilang paninikluhod sa im- peryalistang amo, sunud-sunuran si Aquino sa atas ng International Mo- netary Fund na magpataw ng dag- dag na mga buwis sa mamamayan, itaas ang singil sa mga ser- bisyo publiko at bawasan ang mga subsidyo para mapigilan ang lalong pagkabangkarote ng gub- yerno. Napigilan lamang ng ma- lakas na mga protesta at maagap na pagkilos ng



**Mga tampok sa isyung ito...**

**Hostage crisis,**  
larawan ng kabulukan  
at kainutilan PAHINA 3

**35 armas nasamsam**  
ng BHB, 42 kaaway  
napatay PAHINA 5

**Gerilyang pagsusulat**  
PAHINA 8

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)